

आकाशवाणी जयपुर-अजमेर
प्रादेशिक समाचार
दिनांक 03.02.2025 समय: 18.45 बजे

- विधानसभा मांय आज धर्मांतरण विरोधी बिल पेश करी ज्यो-जोरी ऊं धर्म मांय बदली करावण परां सजा रो प्रावधान ।
- केन्द्रीय श्रम अर रोजगार मंत्री शोभा करंदलाजे कह्यो-देश मांय बेरोजगारी री रेट मांय कमी आयी ।
- रेलमंत्री अश्विनी वैष्णव कह्यो-रेलवे ने और बेहतर बणावण अर डिजिटल सिस्टम सारू केई जतन कर्या जा रह्या है ।
- प्रदेश री सरकारी अर गैर-सरकारी स्कूलां मांय आज सूर्य नमस्कार रो कार्यक्रम राख्यी ज्यो ।

000

विधानसभा मांय आज स्वास्थ्य मंत्री गजेन्द्र सिंह खींवर धर्मांतरण विरोधी बिल 2025 पेश कीनो । इण रे मुजब मर्जी ऊं धर्म बदली करण सारू साठ दिन पहली कलेक्टर ने जाणकारी देवणी व्हेला । बिल मांय धर्म मांय जबरदस्ती बदलाव करावण री सूरत मांय सजा अर लव जिहाद रे खिलाफ करड़ा प्रावधान करी ज्या है ।

000

विधानसभा मांय आज प्रश्नकाल रे दौरान राज्य मांय ओला पड़बा रे कारण व्ह्या फसल खराबा रा मामला मांय आपदा राहत राज्यमंत्री ओटाराम देवासी रा जवाब ऊं असंतुष्ट विपख शोर-शराबो कीनो । श्री देवासी विधायक सुरेश गुर्जर रा सवाल रा लिखित जवाब मांय बतायो के खानपुर हलका मांय साल 2023 अर 2024 मांय साखां मांय तीस फीसदी या बत्तो खराबो नी व्ह्यो । बाद मांय खबरनवीसां सागे बातचीत करता थकां सदन मांय विपख रा नेता टीकाराम जूली कह्यो के घणी बिरखा ऊं प्रदेश मांय 50 फीसदी ऊं बत्ती साखां मांय खराबो व्ह्यो । वे सरकार माथे नुकसान ने कम कर र 33 फीसदी बतावण रो आरोप मांड्यो । वे कह्यो के सरकार ने किसानां ने मुआवजा रो ब्यौरो देवणो चाहिजे ।

.....

दूजी कानी संसदीय कार्यमंत्री जोगाराम पटेल खबरनवीसां सागे बातचीत करता थकां कह्यो के विपख कने कोई मुद्दो नी है अर वे महज आरोप-प्रत्यारोप री सियासत कर रह्या है ।

.....

ई बीचे विधानसभा अध्यक्ष वासुदेव देवनानी अर मुख्यमंत्री भजनलाल शर्मा आज विधानसभा ने डिजिटल अर हाईटेक बणावण सारू तैयार करी ज्या नेवा सेवा केन्द्र रो उद्घाटन कीनो ।

000

ऊर्जा मंत्री हीरालाल नागर कह्यो है के राज्य रा बिजलीघरां मांय बिजली बणावण अर वां री दक्षता मांय लगातार सुधार व्हे रह्यो है । वे आज विधानसभा मांय प्रश्नकाल रे दौरान पूछी ज्या पूरक सवालां रा जवाब मांय बतायो के प्रदेश मांय लारला आठ महीना मांय सब ऊं बत्ती बिजली बणायी ज्यी । वे बतायो के बिजलीघरां मांय ई दौरान कोयला री खपत मांय कमी ई दर्ज करी ज्यी ।

000

सामाजिक न्याय अर अधिकारिता मंत्री अविनाश गहलोत विधानसभा मांय बतायो के मुख्यमंत्री कन्यादान योजना रा तैत मिलण वाळा फायदा सारू अब ब्याह रा एक साल ताई अर्जी दी जा सके है । ई सारू 31 जनवरी ने सरकूलर जारी कर दियो ज्यो है ।

000

देश मांय लारला माली साल मांय बेरोजगारी री रेट पांच साल पैली रा 6 फीसदी री तुलना मांय घट र 3 दशमलव 2 फीसदी रह ग्यी है। श्रम अर रोजगार राज्य मंत्री, शोभा करंदलाजे एक सवाल रा जवाब मांय आज लोकसभा मांय आ जाणकारी दीनी। वे बतायो के नवीनतम आवधिक श्रम बल सर्वेक्षण—पीएलएफएस 15 साल अर बत्ती उम्र रा नौजवानां मांय बेरोजगारी री रेट री कमी रो संकेत दीनो है। वे कह्यो के सरकार रोजगार क्षमता बधावण सारु केई योजनावां अर कार्यक्रमं चलाया है। मंत्री कह्यो के आवता पांच साल मांय चार करोड़ ऊं बत्ता नौजवानां ने रोजगार कौशल अर मौका मुहैया करावण सारु चालू माली साल मांय पीएम पैकेज रा तैत पांच योजनावां रो ऐलाण करी ज्यो है।

000

रेलमंत्री अश्विनी वैष्णव कह्यो है के रेलवे ने और बेहतर बणावण अर डिजिटल सिस्टम सारु भांत-भांत रा जतन कर्या जा रह्या है। वे आज वीडियो कॉन्फ्रेंस रे मार्फत खबरनवीसां ने रेलवे मांय हिफाजत अर विकास ऊं जुड़ी जाणकारियां दीनी। श्री वैष्णव कह्यो के नुवी पटरिया बिछावण अर टेशनां माथे और बेहतर सुबीता मुहैया करावण सारु व्यवस्थित तरीका ऊं काम कर्यो जा रह्यो है। वे कह्यो के एक सौ नुवी अमृत भारत अर दो सौ नुवी वंदे भारत रेलगाड़ियां चलाई जावेला। रेल मंत्री कह्यो के नुवी तकनीक री मदद ऊं रेलवे हलका मांय ऊर्जा री खपत ने स्थिर करीजी है।

.....
प्रदेश री सरकारी अर गैर-सरकारी स्कूलां मांय आज भेळा सूर्य नमस्कार रो कार्यक्रम राख्यी ज्यो। इण मांय विद्यार्थी, शिक्षक अर कर्मचारी उमाव सागे शिरकत कीनी। जयपुर रा सवाईमानसिंह स्टेडियम मांय राख्यी ज्या खास जळसा मांय शिक्षा मंत्री मदन दिलावर ई विद्यार्थियां सागे सूर्य नमस्कार कीनो।

खबरनवीसां सागे बातचीत करता थकां श्री दिलावर कह्यो के योग रा प्रति जाग जगावण सारु आ पहल करी ज्यी है। वे कह्यो के रोजीना सूर्य नमस्कार करण ऊं ताजगी आवे है अर सगळा ने रोजीना सूर्य नमस्कार करणो चाहिजे। नागौर, चित्तौडगढ, भरतपुर, करौली, श्रीगंगानगर अर पाली समेत न्यारा-न्यारा जिलां मांय विद्यार्थी सूर्य नमस्कार कीनो।

000

राज्यपाल हरिभाऊ बागडे काल मनाई जावण वाळी देवनारायण जयंती रे मौके बधाई अर शुभकामनावां दीनी है। श्री बागडे कह्यो के भगवान देवनारायण गायां रा रखवाळा अर बेसहारा लोगां रा दुःख दूर करण वाळा है। मुख्यमंत्री भजनलाल शर्मा ई वां रा संदेश मांय जनता ऊं भगवान देवनारायण रा आदर्शा ने अपना र समाजिक समरसता मजबूत करण री अपील कीनी। देवनारायण जयंती रा सिलसिला मांय आज जयपुर मांय खास जळसो राख्यी ज्यो। इण मांय मुख्यमंत्री भजनलाल शर्मा कह्यो के भगवान देवनारायण ने मानण वाळां रो सामाजिक समरसता बणावण मांय खास काम है।

.....
विधानसभा अध्यक्ष वासुदेव देवनानी, गृह राज्यमंत्री जवाहर सिंह बेढ़म अर प्रदेश भाजपा अध्यक्ष मदन राठौड़ ई कार्यक्रम मांय शिरकत कीनी।

000

प्रयागराज मांय चाल रह्या महाकुंभ मांय आज तीजो अमृत स्नान करी ज्यो। संवारे मोटी तादाद मांय जातरु गंगा आरती मांय ई शिरकत कीनी। वसंत पंचमी रा सिलसिला मांय व्ह्या अमृत स्नान सारु हिफाजत रा करड़ा इन्तजामात करी ज्या। महाकुंभ मेला हलका रे नो व्हिकल अर नो वीआईपी ज़ोन व्हेवण रो ऐलाण करी ज्यो है। दुनिया रा सब ऊं मोटा धार्मिक समागम रा तौर ऊं पिछाण्या जावण वाळा महाकुंभ मांय पहलो अमृत स्नान 14 जनवरी ने सकरांत अर दूजो 29 जनवरी ने मौनी अमावस रे दिन करी ज्यो हो। हाल ताई 36 करोड़ ऊं बत्ता जातरु महाकुंभ मांय पवित्र स्नान कर चुक्या है।

000

जयपुर लिटरेचर फेस्टिवल आज पूरो व्हे रह्यो है। तीस जनवरी ऊं चाल रह्या पांच दिन रा ई आयोजन मांय देश-परदेश रा नामी लेखक, साहित्यकार अर कलाकार न्यारा-न्यारा मुद्दां माथे

विचार बताया। साहित्य रा ई महाकुंभ मांय अढाई सौ सत्रां मांय छह सौ हस्तियां विचार साझा कीना। जेएलएफ रा ई 18वां संस्करण मांय सौ ऊं बत्ता देशां रा मेहमान शिरकत कीनी।

000

राजस्थान स्टेट गैस लिमिटेड आज कोटा मांय 12वों कम्प्रेस्ड नेचुरल गैस—सीएनजी भरण रो टेशन सुरू कीनो। आरएसजीएल रा प्रबंध निदेशक रणबीर सिंह आ जाणकारी दीनी। वे बतायो के 24 ई घंटा खुल्या रेहवण वाळा ई टेशन ऊं रोजीना साढे सात हजार किलोग्राम सीएनजी मुहैया करायी जावेला। कोटा रा सीएनजी टेशनां रे जरिये आरएसजीएल री ओर ऊं रोजीना औसतन 37 हजार किलोग्राम ऊं बत्ती सी.एन.जी. री बिक्री करी जा रही है।

000

जयपुर रा जामडोली हलका मांय आज नुवो पुलिस थाणो खुल्यो। जयपुर पुलिस कमिश्नरेट रा तैत खोली ज्या ई थाणा मांय कानोता, जयसिंहपुरा खोर अर गलता गेट रा कुछ हलका शामिल करी ज्या है। ई मौके जयपुर रा पुलिस कमिश्नर बीजू जॉर्ज जोसफ पुलिस वाळां ने हलका मांय शांति अर सुरक्षा बणाई राखण सारू काम करण रा हुकम दीना।

000

भारतीय क्रिकेट कंट्रोल बोर्ड—बीसीसीआई उन्नीस साल ऊं कम उम्र री महिला खिलाड़ियां रो टी-20 विश्व कप लगातार दूजी दफा जीतण परां टीम ने पांच करोड़ रुपया रो नकद इनाम देवण रो ऐलाण कीनो है। भारतीय महिला टीम शैफाली वर्मा री कप्तानी मांय साल 2023 मांय पहली दफा टी-20 विश्व कप जीत्यो हो जद के निकी प्रसाद री अगुवाई मांय दूजी दफा टी-20 विश्व कप खुद रे नाम कीनो।

000